

Neispunjavanje EU standarda uzrokovalo zabranu uvoza

Na popisu Ministarstva vanjske trgovine i ekonomskih odnosa BiH našla su se imena velikog broja hrvatskih kompanija kojima je do daljnjeg uvedena zabrana uvoza proizvoda na bh. tržište, sve dok ne ispune standarde proizvodnje Europske unije. Ministar vanjske trgovine i ekonomskih odnosa BiH Mirko Šarović još ranije je najavio kako je odluka o zabrani uvoza određenih proizvoda iz RH nastupila kao logičan slijed okolnosti nakon ulaska Hrvatske u EU. U bh. ministarstvu tvrde kako od hrvatskih kompanija treba tražiti da ispune sve uslove EU pri izvozu, baš onako kako se to traži i od BiH kada izvozi u Hrvatsku.

Kad hrvatske kompanije sa popisa ispune standarde EU, vlasti u BiH će ponovo donijeti odluku o njihovom slobodnom uvozu. Iako je ranije bilo tvrdnji kako će zabrana uvoza biti uglavnom koncentrisana na manje proizvođače mesa i mesnih prerađevina, sudeći prema popisu, ona se proširila na konditorsku, mliječnu i prehrambenu industriju. Na popisu „otpisanih kompanija“ se nalazi nekoliko respektabilnih proizvodnih hrvatskih kompanija.

Hrvatski ministar poljoprivrede Tihomir Jakovina već je kazao kako su neugodno iznenađeni odlukom bh. vlasti o zabrani uvoza proizvoda životinjskog porijekla proizvedenih u neusaglašenim objektima u Hrvatskoj. Čak je iznio nadu kako će vlasti iz BiH, kako je rekao, još jednom preispitati svoju odluku, a ako bude potrebno, Hrvatska će svoje interese zaštititi kroz institucije EU. Ministar Jakovina tada je rekao kako se radi o 18 manjih objekata, to su manje kompanije i obrti, i njihov značaj u hrvatskoj vanjskotrgovinskoj razmjeni s BiH je minoran.

S druge strane, Europska komisija smatra da svi prehrambeni proizvodi kompanija iz Hrvatske navedeni pod „registar odobrenih objekata koji se bave hranom životinjskog porijekla“ trebalo bi da nastave da se izvoze u BiH. Europska komisija navodi da, u skladu sa važećim zakonom u BiH, vlasti u zemlji mogu da provjere da li kompanije iz Hrvatske ispunjavaju minimalne standarde jednake onima u BiH kako bi se omogućio nastavak uvoza bez rizika po bezbjednost hrane, te da BiH ne bi

trebalo da zahtijeva od Hrvatske više standarde od onih koje primjenjuje na svoje potrošače. Komisija naglašava da gotovo svi hrvatski poljoprivredni proizvodi životinjskog porijekla ispunjavaju EU standarde o bezbjednosti hrane te poručuju kako je između EU i Hrvatske dogovoren prelazni period do kraja 2015. godine, do kada preostali određeni broj objekata u Hrvatskoj mora ispuniti standarde EU. *„Određeni proizvođači hrane još uvijek moraju ispuniti određene strukturne uslove, zbog čega ne mogu izvoziti svoje proizvode ostalim državama članicama EU. Proizvodi ovih kompanija mogu biti na hrvatskom tržištu, jer kompanije u potpunosti osiguravaju sigurnost hrane, a mogu se izvoziti i u treće zemlje, kao što je BiH, ukoliko se zemlja odredišta slaže“*, navodi se u saopćenju Europske komisije. Takav uvoz iz Hrvatske u BiH odvijao se i bio je dozvoljen prije ulaska Hrvatske u EU na osnovu bilateralnog sporazuma, koji je prestao da važi ulaskom Hrvatske u EU.

